

## I. DISPOSICIÓN XERAIS

### MINISTERIO DE DEFENSA

**7834** *Real decreto 336/2018, do 25 de maio, polo que se crea a medalla de campaña para recoñecer a participación en determinadas operacións militares e campañas no exterior e se establecen os criterios xerais para a súa concesión.*

A disposición adicional terceira.2 do Real decreto 1040/2003, do 1 de agosto, polo que se aproba o Regulamento xeral de recompensas militares, establece que «para destacar a participación de persoal civil ou militar en determinadas operacións militares e campañas, poderán crearse, mediante real decreto, medallas de campañas, sen que teñan a consideración de recompensas militares nin poidan xerar ningún outro dereito distinto ao do seu uso como recoñecemento da participación nas operacións e campañas, ao teren un carácter unicamente honorífico».

Por outra parte, a Doutrina para o emprego das Forzas Armadas, do 27 de febreiro de 2018, establece no número 1, «Operacións», da súa parte 4: «enténdese por operación militar o conxunto de accións coordinadas en tempo, espazo e propósito por unha autoridade militar para alcanzar obxectivos militares de acordo co establecido nunha directiva, plan ou orde». E, igualmente, respecto do termo «campaña», no mesmo número, dispónse o seguinte: «cando para alcanzar os obxectivos estratéxicos militares sexa necesario desenvolver unha serie de operacións militares relacionadas entre si, denominarase campaña».

Nos últimos anos, a participación das Forzas Armadas en operacións internacionais, realizadas normalmente fóra de territorio nacional, tanto no marco de organizacións internacionais como formando parte de coalicións multinacionais ou en solitario, deixou de ser un feito excepcional para converterse nunha forma máis de emprego das nosas forzas.

No primeiro dos casos, normalmente as organizacións internacionais recoñecen a participación e os servizos prestados nesas operacións, polos riscos, penalidades e condicións extremas a que se está sometido durante o seu desenvolvemento, con diversas medallas establecidas para tal efecto. Non obstante, para o resto de operacións ou campañas en que se poida participar en coalicións multinacionais ou en solitario, non se establece na normativa vixente a concesión de medalla ningunha, o que produce unha situación de discriminación respecto dos participantes en operacións ou campañas no marco de organizacións internacionais.

Como consecuencia de canto antecede, determinouse a conveniencia de crear unha medalla de campaña, de carácter nacional, que se concederá para operacións militares e campañas, en coalicións multinacionais, en solitario ou baixo mandato dunha organización internacional que non teñan asociada a concesión dunha medalla específica, e cun carácter unicamente honorífico.

Este real decreto adecúase aos principios de boa regulación conforme os cales deben actuar as administracións públicas no exercicio da iniciativa legislativa e a potestade regulamentaria, como son os principios de necesidade, eficacia, proporcionalidade, seguridade xurídica, transparencia e eficiencia, previstos no artigo 129 da Lei 39/2015, do 1 de outubro, do procedemento administrativo común das administracións públicas.

A norma cumpre co principio de necesidade e eficacia, dado que está xustificada por unha razón de interese xeral, e co principio de seguridade xurídica ao integrarse no marco da regulación das recompensas militares e, por outra parte, atende ao principio de eficiencia, pois non supón novas cargas administrativas.

En canto ao principio de proporcionalidade, a norma ten o contido mínimo posible e, polo que atinxe ao principio de transparencia, durante a súa tramitación, o proxecto desta norma foi obxecto de informe das asociacións profesionais con representación no Consello

de persoal das Forzas Armadas, conforme o artigo 40.2.b) da Lei orgánica 9/2011, do 27 de xullo, de dereitos e deberes dos membros das Forzas Armadas, e deuse coñecemento del ao resto de asociacións profesionais inscritas no Rexistro de Asociacións Profesionais de Membros das Forzas Armadas, conforme o artigo 40.1.c) da Lei orgánica 9/2011, do 27 de xullo. Finalmente, conforme o establecido no artigo 49.1.c) da citada lei orgánica, foi emitido informe polo Consello de Persoal das Forzas Armadas.

Así mesmo, conforme o artigo 25 da Lei 50/1997, do 27 de novembro, do Goberno, o real decreto consta incluído no plan anual normativo de 2018.

Na súa virtude, por proposta da ministra de Defensa, de acordo co Consello de Estado e logo de deliberación do Consello de Ministros na súa reunión do día 25 de maio de 2018,

#### DISPOÑO:

##### Artigo 1. *Obxecto e ámbito de aplicación.*

Este real decreto ten por obxecto crear a medalla de campaña e establecer os criterios xerais para a súa concesión, para recoñecer a participación de persoal das Forzas Armadas, así como, se é o caso, das forzas e corpos de seguridade do Estado, de persoal civil nacional e de persoal militar e civil estranxeiro, integrado ou adscrito a unidades militares, en operacións militares e campañas no exterior, baixo unha coalición multinacional, nunha forza de ámbito nacional ou no marco de organizacións internacionais, sempre que non teñan xa asociada a concesión dunha medalla específica nas devanditas operacións.

##### Artigo 2. *Requisitos para a concesión da medalla de campaña.*

1. A concesión da medalla de campaña basearase nos seguintes tempos de permanencia, ou número de misións de voo para as dotacións de aeronaves, nas operacións ou campañas en que se participe:

a) Un ou varios tempos de permanencia en zona de operacións, dunha mesma operación, que totalicen como mínimo trinta (30) días.

b) 10 misións de voo para as dotacións de aeronaves, sobre a zona de operacións en que se leve a cabo a operación, sen que estas misións impliquen necesariamente a aterraxe no devandito territorio, e contabilizando un máximo dunha misión diaria.

2. Para os efectos de contabilización do tempo de permanencia en zona de operacións, entenderase como a mesma operación aquela para a que o persoal participante foi designado, con independencia de que poidan variar o mandato, o acordo ou a orde que a orixinaron, a coalición multinacional ou a zona de operacións, sempre e cando non estea asociada a concesión doutra medalla específica.

3. Non contabilizará como tempo de permanencia en zona de operacións o tempo que se cumpra en actividades realizadas fóra da zona de operacións expresamente delimitada, aínda que o labor que se realice estea directamente relacionado coa operación ou campaña motivo desta medalla.

4. Para a concesión desta medalla, é necesario que houbese unha designación ou nomeamento expreso, por escrito, xa sexa individualmente ou formando parte dunha unidade, dotación de buque ou tripulación de aeronave, para a participación nunha operación ou campaña.

##### Artigo 3. *Normas xerais sobre o procedemento para a concesión e uso da medalla de campaña.*

1. O procedemento para a concesión da medalla de campaña, que se iniciará de oficio, tramitarase e resolverase de acordo co que dispoña o ministro de Defensa mediante orde ministerial.

2. Non obstante o disposto no punto anterior, non se concederá esta medalla ao persoal cuxa participación nunha operación ou campaña se encontre xa expresamente recoñecida pola organización internacional ou coalición multinacional baixo cuxo mandato ou acordo se participe, coa concesión doutra medalla específica.

3. Tampouco se concederá esta medalla ao persoal que fose condenado por delito ou estea a ser investigado por feitos delituosos, ou ben fose sancionado disciplinariamente por faltas moi graves ou graves cometidas durante a súa permanencia na operación motivo da condecoración.

4. A medalla de campaña concederáse por resolución do xefe de Estado Maior da Defensa, por proposta do comandante do Mando de Operacións. A resolución de concesión publicarase no «Boletín Oficial del Ministerio de Defensa», e poderá ser usada desde a data de publicación.

5. Queda autorizado o uso da medalla de campaña sobre o uniforme, segundo o establecido na Orde DEF/1756/2016, do 28 de outubro, pola que se aproban as normas de uniformidade das Forzas Armadas, a partir da data de publicación.

6. A concesión da medalla será compatible coa concesión de recompensas militares que poidan ser outorgadas en recoñecemento aos méritos específicos contraídos con ocasión da participación nas operacións ou campañas establecidas no artigo 1.

7. Esta medalla poderá concederse tantas veces se participe nunha mesma operación, sempre que para cada unha destas participacións se cumpra o establecido no número 1 do artigo 2.

#### Artigo 4. *Concesión extraordinaria da medalla de campaña.*

Poderase conceder a medalla de campaña, con carácter extraordinario, ao persoal que por motivos de actos de servizo ou unha continxencia profesional, falecese, se dea por desaparecido ou fose repatriado por feridas ou lesións graves, como consecuencia da súa permanencia nas operacións ou campañas establecidas no artigo 1.

#### Artigo 5. *Efectos da concesión da medalla de campaña.*

1. A medalla de campaña terá un carácter unicamente honorífico e que non terá a consideración de recompensa militar nin xerará ningún outro dereito distinto ao do seu uso.

2. A medalla de campaña anotarase no punto relativo a «Condecoracións» da folla de servizos do persoal militar a que se lle conceda.

3. Non se computará para os efectos de valoración nin nas avaliacións en que se vexa incluído o persoal a que se lle concedese, nin en ningún outro caso, nin terá efecto administrativo ningún ou outro recoñecemento diferente ao da súa concesión.

#### Artigo 6. *Descrición da condecoración correspondente á medalla de campaña e dos rectángulos de operación.*

1. A condecoración da medalla de campaña e os rectángulos de operación terán as seguintes características, como se mostran no anexo:

a) Medalla circular de 30 milímetros de diámetro, plana, co campo liso e os cantos rebordados.

b) Polo seu anverso, no campo de prata brillante, a aspa de Borgoña de goles, resaltada no centro coa Coroa Real; e en punta bordeando o círculo de dereita a esquerda pola parte inferior, en letra de pau e altorrelevo, a lenda, en maiúsculas, OPERACIÓNS MILITARES E CAMPAÑAS.

c) No reverso, no campo de prata brillante, no centro a lenda, en maiúsculas, ABNEGACIÓN E SACRIFICIO, postas en faixa en letra de pau e altorrelevo, orlada de ramo de loureiro nervado e frotado de sinople e palma de ouro, unidos polos seus troncos e liados en punta por fita de goles.

d) A fita de que se ha de levar pendente a medalla será de 30 milímetros de largo e 40 milímetros de longo, de cor azul, con dúas listas de 5 milímetros de largura das cores da bandeira nacional a ambos os dous lados, separados 3 milímetros dos bordos desta. Sobre o bordo superior, esta fita levarase suxeita por unha fibela de metal, da forma e dimensións proporcionadas e usuais para este tipo de condecoración; e sobre o bordo inferior, solidario coa medalla e do mesmo metal que esta, enganche en forma de bóla de 3 milímetros de diámetro, polo que se pasa unha argola horizontal de 33 milímetros de largura e 3 milímetros de altura, atravesada da fita da medalla.

e) A dita fita portará o rectángulo de operación, de metal en prata brillante, de 4 milímetros de largo, disposto sobre a fita e coa lenda correspondente ao nome identificativo das correspondentes operacións en negro.

2. Se se estiver en posesión de máis dunha medalla de campaña como consecuencia da participación en diferentes operacións, só se ostentará unha medalla e a participación nelas acreditarase mediante os rectángulos de operación.

O número máximo de rectángulos de operación que poderán colocarse sobre a fita da medalla, unha vez concedida a medalla, será de tres, a partir do cal se deberá levar outra medalla para a colocación dos sucesivos rectángulos de operación concedidos, aplicando esta regra sucesivamente. Estes rectángulos de operación colocaranse, segundo a súa orde de concesión, desde o bordo inferior, por riba da argola horizontal da fita cara ao bordo superior, cunha separación de 3 milímetros entre eles.

3. A condecoración en tamaño miniatura terá idéntico deseño ao descrito no número 1 deste artigo 5, coas dimensións proporcionais que lle correspondan. Neste tamaño, ostentaranse tantas medallas de campaña como se posúan.

#### *Artigo 7. Descrición do pasador da medalla de campaña.*

1. O pasador representativo da condecoración correspondente á medalla de campaña está constituído pola fita da medalla nas cores descritas, de 30 milímetros de lonxitude por 10 milímetros de largo, montada sobre armazón de metal dourado, e enmarcada por dúas barras laterais do devandito metal, de 12 milímetros de lonxitude e 2 milímetros de largo cada unha. Sobre a fita e no seu centro irá incorporado un rectángulo de dimensións reducidas proporcionais ao pasador, do mesmo metal que a medalla, co nome identificativo da correspondente operación, segundo se mostra no anexo.

2. Ostentaranse tantos pasadores como medallas de campaña se posúan, sendo a súa orde de precedencia a da concesión.

#### *Disposición adicional única. Contención do gasto público.*

As actuacións derivadas deste real decreto en ningún caso supoñerán incremento de dotacións nin de retribucións nin doutros custos de persoal.

#### *Disposición transitoria única. Operacións militares e campañas no exterior pasadas.*

Terá dereito á concesión da medalla de campaña, con carácter retroactivo, o persoal que desde o 1 de xaneiro de 1989, ano de inicio da participación das Forzas Armadas españolas en misións internacionais, participase naquelas operacións militares e campañas no exterior que se determine, de acordo co expresado nos artigos 1 e 2 deste real decreto.

#### *Disposición derradeira primeira. Título competencial.*

Este real decreto dítase ao abeiro do previsto no artigo 149.1.4.<sup>a</sup> da Constitución, que atribúe ao Estado a competencia exclusiva en materia de Defensa e Forzas Armadas.

Disposición derradeira segunda. *Facultades dispositivas.*

1. Facúltase o ministro de Defensa para que adopte as medidas necesarias que requira a execución deste real decreto e, en particular, para determinar as normas sobre a medalla de campaña, segundo o establecido neste real decreto, incluíndo, en todo caso, o seguinte: a tramitación (procedemento, condicións de tempo e exclusións para esta, en comisión de servizo ou posteriormente, unidade de trámite e unidade responsable da súa xestión no Estado Maior da Defensa), a concesión (procedemento), os efectos (anotación na folla de servizos), as limitacións e o uso desta.

2. Facúltase o xefe de Estado Maior da Defensa para determinar, mediante resolución, o nome identificativo das correspondentes operacións militares e campañas no exterior en que se conceda a medalla de campaña, así como a área xeográfica que se definirá como zona de operacións para os efectos da súa concesión, segundo o establecido neste real decreto e na citada orde ministerial de aplicación.

Disposición derradeira terceira. *Entrada en vigor.*

O presente real decreto entrará en vigor aos vinte días da súa publicación no «Boletín Oficial del Estado».

Dado en Madrid o 25 de maio de 2018

FELIPE R.

A ministra de Defensa  
María Dolores de Cospedal García

## ANEXO

**Deseño da condecoración, rectángulos de operación e pasadores da medalla de campaña**

1. Representación gráfica da condecoración e rectángulos de operación da medalla de campaña.



2. Representación gráfica dos pasadores da medalla de campaña.



3. As referencias «Pantone», para a normalización da cor dos esmaltes, serán as seguintes:

PALETA DE COR «PANTONE» («MATCHING SYSTEM»)	
PRATA . . . .	(PRATA BRILLANTE PARA DEBUXAR).
AZUR . . . . .	PANTONE 300 CV.
GOLES . . . .	PANTONE RED 032 CV.
OURO . . . . .	(AMARELO BRILLANTE PARA DEBUXAR).